

## ISU RASUAH: INISIATIF SPRM MELALUI PROGRAM PERKASA ANTIRASUAH DALAM MASYARAKAT

Azman Ab Rahman<sup>i</sup>, Md Yunus Abd. Aziz<sup>ii</sup>, Ahmad Zaki Bin Salleh<sup>iii</sup> & Anis Nabilah<sup>iv</sup>

<sup>i</sup>(Penulis Korespondan). Professor, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, [azman@usim.edu.my](mailto:azman@usim.edu.my)

<sup>ii</sup>Pensyarah Kanan, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, [yunus@usim.edu.my](mailto:yunus@usim.edu.my)

<sup>iii</sup>Profesor Madya, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, [ahmadzaki@usim.edu.my](mailto:ahmadzaki@usim.edu.my)

<sup>iv</sup>Pembantu Penyelidik, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, [anisbella49@gmail.com](mailto:anisbella49@gmail.com)

### Abstrak

*Sejak kebelakangan ini, kes jenayah rasuah dilihat semakin meningkat di kalangan masyarakat di Malaysia mahupun luar negara. Hal ini dapat dilihat dengan jelas daripada catatan statistik yang direkodkan melalui aduan dan penangkapan yang dibuat oleh pihak berkuasa. Oleh yang demikian, pihak kerajaan telah mengambil inisiatif dengan melancarkan program-program yang bertujuan memperkasakan budaya antirasuah dalam masyarakat majmuk. Maka, kajian yang dibuat ini meletakkan objektif untuk memberi fokus kepada inisiatif organisasi Suruhanjaya Pencegahan Rasuah Malaysia dalam menyebarkan budaya antirasuah dalam masyarakat melalui program yang dilancarkan. Kajian ini juga membincangkan implikasi memperkasa budaya antirasuah terhadap masyarakat dalam kehidupan semasa. Kajian kualitatif ini menggunakan kaedah dokumentasi untuk melihat isu rasuah serta membandingkan dengan inisiatif kerajaan dalam memupuk budaya antirasuah terhadap kehidupan masyarakat kini. Hasil kajian mendapati inisiatif perkasa budaya dan sikap antirasuah melalui program dapat membantu dalam membendung gejala rasuah di Malaysia seterusnya melahirkan generasi yang berkualiti tinggi. Justeru itu, menjadi satu perkara yang penting bagi kerajaan untuk memberi kesedaran antirasuah melalui program-program berimpak tinggi dan memasukkannya ke dalam agenda utama.*

Kata kunci: Rasuah, perkasa, antirasuah, masyarakat.

### PENDAHULUAN

Di negara Malaysia ini, rata-rata masyarakat telah mengetahui bahawa rasuah ~~ini~~ merupakan satu jenayah yang boleh dikenakan tindakan dan hukuman berat jika didapati bersalah. Antara hukumannya adalah penjara sehingga 20 tahun dan denda 5 kali ganda nilai suapan yang diterima atau kedua-duanya sekali. Namun begitu, di samping mengenakan tindakan undang-undang yang tegas pelbagai dasar, peraturan dan program pendidikan perlu dilaksanakan bagi mencegah penyebaran budaya

rasuah dalam masyarakat. Ini kerana, perbuatan rasuah ibarat barah yang menyelinap masuk secara perlahan-lahan ke dalam setiap inci anggota tubuh badan manusia dan akhirnya memusnahkan sistem yang sedia ada.

Secara umumnya, gejala rasuah boleh terjadi di pelbagai sektor dan tidak mengira peringkat umur. Gejala rasuah juga tidak tertakluk kepada pegangan politik, faktor bangsa, agama mahupun peringkat umur kerana hakikatnya jenayah ini akan memerangkap sesiapa saja yang berkemungkinan untuk menjadi mangsa. Apabila diperhatikan, hal ini sering terjadi kepada individu yang mempunyai pegangan nilai integriti yang lemah dan kedudukan kewangan yang rapuh sehingga terjatuh dalam jebakan jenayah rasuah akibat tergoda dengan pelbagai sogokan. Keadaan ini menjadi lebih parah apabila golongan muda yang baru memulakan kehidupan turut terpalit dengan gejala rasuah. Hal ini tidak mustahil berlaku akibat tekanan kehidupan, tuntutan ekonomi yang menindas, lantas memudahkan individu untuk menerima rasuah demi menikmati kehidupan yang mewah walaupun daripada sumber yang tidak halal.

Gejala rasuah sering dimulakan oleh golongan yang bijak memanfaatkan kesempatan di atas kelemahan sistem, pemimpin, undang-undang dan peraturan bagi memenuhi kehendak peribadi tanpa memikirkan natijah dan kesan buruk pada masa hadapan. Golongan ini merupakan golongan minoriti namun mempunyai pengaruh yang besar untuk mendapatkan suapan rasuah sehingga sanggup menggunakan penindasan serta unsur-unsur ugutan jika terdesak. Perkara ini kerap kali berlaku dalam sesebuah sistem organisasi (Ahmad Khusairi, t.th). Menurut Andreas Petrou (2017), peranan sesebuah organisasi dibentuk melalui sistem penilaian kerja yang menggabungkan penilaian kerja dan prestasi korporat dengan mewujudkan KPI yang sesuai dan sasaran yang boleh dicapai.

Di Malaysia, kerajaan mengambil inisiatif dalam membendung gejala rasuah yang kian menular di kalangan masyarakat dengan menubuhkan organisasi yang mampu mengawal dan mencegah penularan jenayah rasuah. Ini direalisasikan melalui penubuhan Suruhanjaya Pencegahan Rasuah Malaysia (SPRM) sebagai organisasi yang berfungsi dalam mencegah aktiviti jenayah rasuah di dalam negara. Di samping itu, organisasi ini bertindak sebagai penggerak dalam memberi kesedaran kepada masyarakat tentang gejala rasuah dan kesan yang dihadapi jika kegiatan rasuah ini menjadi amalan dan normalisasi dalam sistem pentadbiran agensi kerajaan mahupun swasta. Kegiatan jenayah rasuah ini boleh berlaku di pelbagai peringkat

umur (Noor Mohamad, 2023). Hal ini dibuktikan melalui penangkapan oleh pihak berkuasa yang tidak kenal umur, bangsa, agama dan kedudukan.

## **METODOLOGI KAJIAN**

Metodologi kajian adalah satu pelan tindakan yang memperlihatkan bagaimana sesuatu kajian dijalankan. Metodologi kajian menjadi panduan kepada pengkaji untuk mengumpul dan menganalisis data terhadap penyelidikan yang dijalankan. Dalam kajian ini, metodologi yang digunakan adalah berasaskan pendekatan kualitatif. Kajian ini menggunakan dokumentasi untuk mendapatkan data primer dan sekunder berkaitan objektif kajian.

### **Kaedah Analisis Data**

Penyelidikan akan menjalankan analisis deskriptif kualitatif, yang melibatkan penyediaan penerangan terperinci tentang objek kajian, khususnya berkaitan dengan hipotesis yang dirumuskan. Melalui analisis ini, satu kesimpulan akan dibuat berdasarkan tafsiran (Setyosari, 2013). Penyelidikan akan berasaskan teori dan pada masa yang sama akan menggabungkan data lapangan. Data yang dianalisis akan menggunakan kaedah deduktif untuk mengurus dan menganalisis data, bermula dengan maklumat umum dan kemudian membuat kesimpulan khusus (Hanum, 2013).

### **Kaedah Dokumentasi**

Kaedah dokumentasi melibatkan kajian analisis terhadap bahan-bahan bercetak seperti jurnal, buku, artikel, prosiding, akhbar dan sebagainya. Penyelidik menggunakan kaedah dokumentasi ini untuk mendapatkan gambaran yang lebih jelas dan mendalam terhadap kajian yang ingin dijalankan.

## **SEJARAH ORGANISASI SPRM DI MALAYSIA**

Malaysia merupakan sebuah negara yang boleh dianggap maju dengan pelbagai projek pembangunan yang pesat. Hal ini kerana pembangunan menjadi kayu pengukur kelangsungan ekonomi sesebuah negara (Noor, 2020). Namun di sebalik pembangunan yang pesat masih terdapat masyarakat yang terlibat dengan najis rasuah. Maka, sebagai satu badan pemerintah yang bertanggungjawab, pihak kerajaan mengambil langkah-langkah dengan menubuhkan organisasi yang bertujuan mencegah jenayah rasuah dan memberi kesedaran kepada masyarakat tentang keburukan najis rasuah terhadap generasi kini serta kesan terhadap ekonomi negara.

Penubuhan entiti pencegahan rasuah di Malaysia ini bermula dengan sebuah unit kecil yang bertanggungjawab menjalankan aktiviti pencegahan rasuah di bawah portfolio Jabatan Perdana Menteri (JPM). Namun pada ketika itu pendakwaan kes siasatan diletakkan di bawah Bahagian Pendakwaan iaitu Jabatan Peguam Negara dan siasatan kes rasuah dikendalikan oleh Jabatan Siasatan Jenayah (Jenayah Khas). Pada 1 Oktober 1976, kerajaan akhirnya menggabungkan usaha pencegahan rasuah oleh ketiga-tiga agensi itu dengan mewujudkan Badan Pencegah Rasuah (BPR) (Portal SPRM, t.th).

Seterusnya, Akta Biro Siasatan Negara memperkenankan entiti pencegahan rasuah negara diwujudkan secara undang-undang pada 29 Ogos 1973 dan ini sekaligus mengubah Badan Pencegah Rasuah (BPR) kepada Biro Siasatan Negara (BSN). Perubahan perundangan BSN ini memberi mandat kuasa yang luas untuk menyiasat kes berkaitan kepentingan negara selain kes rasuah. Pada tahun 1997, Akta Pencegahan Rasuah 1997 telah diluluskan oleh Parlimen sebagai agensi pengutkuasa pencegahan rasuah negara bagi memperkasakan peranan Badan Pencegah Rasuah dan seterusnya pada tahun 2008, Parlimen bersetuju untuk menubuhkan Suruhanjaya Pencegahan Rasuah Malaysia atau singkatannya (SPRM) selaras dengan hasrat masyarakat yang mahukan entiti pencegahan rasuah yang lebih telus, profesional dan bebas bagi menggantikan Badan Pencegah Rasuah (BPR). Di samping itu, transformasi BPR kepada SPRM bukanlah hanya aspek nama semata-mata namun perubahan ini bertujuan untuk meningkatkan kebebasan, keberkesanan, ketelusan dan kecekapan tindakan pencegahan rasuah di Malaysia.

Selain itu, perubahan ini juga bertujuan untuk menangkis persepsi buruk masyarakat terhadap entiti pencegahan rasuah ini yang sebelum ini dianggap tidak bebas dan tidak telus dalam melaksanakan tanggungjawab sebagai badan pencegah rasuah negara. Menurut SPRM, mekanisme 'check and balance' diwujudkan melalui pembentukan Lembaga Penasihat Pencegahan Rasuah (LPPR), Jawatankuasa Khas Mengenai Rasuah (JKMR), Jawatankuasa Aduan (JKA), Panel Penilaian Operasi (PPO) serta Panel Perundingan dan Pencegahan Rasuah (PPPR) yang berfungsi untuk menasihati dan memantau serta memastikan tanggungjawab dan fungsi Suruhanjaya ini dikuatkuasakan dengan penuh telus dan jujur dalam membanteras aktiviti jenayah rasuah yang menular di dalam kehidupan masyarakat Malaysia. Justeru itu, pemilihan anggota bagi kelima-lima entiti bebas ini hanya dipilih dari kalangan

individu yang amanah dalam menjalankan tanggungjawab dan mempunyai integriti yang cemerlang dalam perkhidmatan serta profesion masing-masing.

## **MOTO, VISI, MISI, OBJEKTIF DAN FUNGSI SURUHANJAYA PENCEGAHAN RASUAH MALAYSIA**

Setiap organisasi yang ditubuhkan mestilah mempunyai matlamat yang jelas untuk mencapai tujuan dan sasaran yang dikehendaki. Justeru itu, penubuhan organisasi ini sudah tentu mempunyai moto, visi, misi dan objektif yang disasarkan secara spesifik. Seajar dengan nama organisasi iaitu Suruhanjaya Pencegahan Rasuah Malaysia, tujuan yang jelas mestilah berkaitan dengan pencegahan rasuah dan sikap individu dalam membanteras jenayah rasuah. Oleh itu, moto, visi, misi dan objektif penubuhan organisasi SPRM adalah seperti berikut:

### **Moto SPRM**

1. Amanah  
Amanah dalam melaksanakan tugas dan bertanggungjawab.
2. Tegas  
Menjalankan siasatan terhadap perlaku rasuah secara objektif dan telus tanpa pilih kasih.
3. Adil  
Adil dalam bertindak secara saksama tanpa prasangka dan berat sebelah dalam semua situasi berteraskan keluhuran undang-undang.

### **Visi SPRM**

1. Mewujudkan masyarakat Malaysia yang bebas daripada rasuah.
2. Menjadikan SPRM agensi pencegahan rasuah bertaraf dunia.

### **Misi SPRM**

1. Menerajui usaha pencegahan rasuah di Malaysia.
2. Menjadikan SPRM sebagai organisasi yang dinamik dan progresif melalui pembangunan kapasiti dan kapabiliti yang berterusan.

### **Objektif SPRM**

Membanteras segala bentuk rasuah, penyalahgunaan kuasa dan penyelewengan secara berterusan.

## **Fungsi SPRM**

Fungsi Suruhanjaya Pencegahan Rasuah Malaysia diperuntukkan di bawah Seksyen 7 Akta Suruhanjaya Pencegahan Rasuah Malaysia (SPRM) 2009 iaitu:

1. Menerima dan menimbangkan apa-apa aduan tentang pelakuan kesalahan di bawah Akta SPRM 2009 dan menyiasat mana-mana aduan itu sebagaimana yang difikirkan praktik oleh Ketua Pesuruhjaya atau pegawai-pegawai itu;
2. Mengesan dan menyiasat:-
  - Apa-apa kesalahan yang disyaki di bawah Akta SPRM 2009;
  - Apa-apa percubaan yang disyaki ~~untuk~~ melakukan apa-apa kesalahan di bawah Akta SPRM 2009; dan
  - Apa-apa komplot yang disyaki ~~untuk~~ melakukan apa-apa kesalahan di bawah Akta 2009;
3. Meneliti amalan, sistem dan tatacara badan-badan awam untuk memudahkan penemuan kesalahan di bawah Akta SPRM 2009 dan ~~untuk~~ menghasilkan kajian semula amalan, sistem atau tatacara itu yang pada pendapat Ketua Pesuruhjaya mungkin membawa kepada rasuah;
4. Mengarahkan, menasihati dan membantu mana-mana orang, atas permintaan orang itu, tentang cara-cara bagaimana rasuah dapat dihapuskan oleh orang itu;
5. Menasihati ketua badan-badan awam tentang apa-apa perubahan dalam amalan, sistem atau tatacara yang sesuai dengan penunaian berkesan kewajipan-kewajipan badan-badan awam itu sebagaimana yang difikirkan perlu oleh Ketua Pesuruhjaya untuk mengurangkan kemungkinan berlakunya rasuah;
6. Mendidik orang ramai untuk menentang rasuah; dan
7. Mendapatkan dan memelihara sokongan orang ramai dalam memerangi rasuah

## **PROGRAM-PROGRAM YANG DILANCARKAN BAGI MEMPERKASA MASYARAKAT ANTIRASUAH**

Dalam usaha membanteras jenayah rasuah di Malaysia, pihak SPRM juga melakukan pelbagai program bagi memperkasakan masyarakat yang bersikap antirasuah. Hal ini kerana, generasi kini lebih terdedah kepada anasir-anasir buruk yang tidak mustahil akan mendedahkan diri mereka kepada najis rasuah. Kekuatan individu dalam

menangkis pujukan dan rayuan sogokan ini perlulah dipupuk dari awal agar fizikal dan mental bersedia dalam menghadapi dan memulakan kehidupan di alam yang lebih mencabar dengan pelbagai tekanan. Selain itu program-program yang dilancarkan ini bersesuaian dengan pelbagai peringkat umur dan tidak mengira bangsa dan agama. Setiap program yang dilakukan mensasarkan objektif yang berbeza mengikut audiens sebagai contoh, terdapat program pendidikan antirasuah yang memfokuskan aktiviti Pendidikan bagi menyampaikan maklumat dan kesedaran mengenai antirasuah.

i) **Program Perkasa Wira Antirasuah**

Program perkasa wira antirasuah (WAR) ini dilaksanakan di Sekolah Kebangsaan Pulau Redang yang berlangsung pada 22 sehingga 24 Mei 2023. Menurut SPRM, program ini merupakan program kolaboratif antara SPRM Terengganu, Bahagian Pendidikan Masyarakat SPRM Ibu Pejabat, Jabatan Pendidikan Negeri Terengganu, Terengganu Incorporated (TI) dan Universiti Malaysia Terengganu (UMT). Program ini juga dibangunkan oleh Bahagian Pendidikan Masyarakat SPRM dan merupakan Modul Pendidikan Antirasuah Sekolah Rendah yang mempunyai sasaran dalam memperkasakan pendidikan integriti dan antirasuah kepada murid sekolah rendah tahun 1 sehingga tahun 6.

Program ini bertujuan untuk memberi pendedahan awal kepada murid-murid di sekolah dalam membudayakan sikap benci terhadap rasuah serta menerapkan sifat amanah dan integriti yang tinggi dalam jati diri mereka (Adli Mohammad, 2023). Selain usaha SPRM dalam melahirkan generasi bebas rasuah, program ini juga turut dijalankan di pelbagai sekolah dan sehingga kini ia telah diadakan di 162 buah sekolah di Malaysia. Program ini juga berupaya untuk memperkukuhkan Pendidikan di peringkat rendah dan menengah yang berteraskan kepada pembentukan sahsiah diri yang baik, semangat kepimpinan yang utuh dan jati diri yang kuat. Ia diselaraskan mengikut tuntutan inisiatif 2.4.6 Pelan Antirasuah Nasional (NACP) 2019-2023 dan Pelan Pembangunan Pendidikan Malaysia (PPPM) 2013-2025, Anjakan 3 iaitu melahirkan rakyat yang menghayati nilai (value). Menurut SPRM, anjakan ini sudah pasti merupakan satu kejayaan apabila dapat melahirkan generasi yang bebas rasuah dan antirasuah melalui sistem pendidikan.

ii) **Program Pemantapan Antirasuah, Integriti Antara FELCRA Dan SPRM**

Program ini dilancarkan di ibu kota Malaysia iaitu Kuala Lumpur pada 7 September 2023 yang dianjurkan oleh pihak FELCRA Berhad dengan kerjasama

Suruhanjaya Pencegahan Rasuah Malaysia (SPRM). Penglibatan seramai 70 peserta yang terdiri daripada Pengurusan Tertinggi FELCRA Berhad serta Ahli Lembaga Pengarah. Program ini bertujuan untuk memastikan urusan perniagaan dijalankan dengan persekitaran bebas rasuah dan ini merupakan usaha yang berterusan dalam pencegahan dan pendidikan antirasuah (Maszureen, 2023). Penglibatan peserta ini terdiri daripada Pengerusi Lembaga Pengarah FELCRA Berhad, Datuk Ahmad Jazlan Yaakub, Timbalan Pengarah Belanjawan Kementerian Kewangan, Nor Azizati Hamzah, Ketua Pegawai Eksekutif FELCRA Berhad, Datuk Mat Roni Zakaria dan Timbalan Pengarah Pencegahan SPRM Kuala Lumpur, Razali Khamis serta pengerusi-pengerusi subsidiari FELCRA Berhad. Program ini dimulakan dengan sesi menandatangani buku pelawat kemudian dengan lawatan ke bilik rakaman percakapan saksi, bilik kawad cam, video *interview room* (VIR) dan lokap SPRM Kuala Lumpur. Hal ini sebagai pendedahan ringkas untuk pengendalian sesuatu proses siasatan (Maszureen, 2023).

Antara pengisian program adalah sesi penerangan dan sesi dialog mengenai kesalahan rasuah di bawah Akta SPRM 2009 dan Liabiliti Korporat Seksyen 17A Akta SPRM 2009 serta taklimat insentif potongan cukai selain pendedahan ringkas mengenai pengendalian proses siasatan (Maszureen, 2023). Seterusnya dalam program ini, taklimat telah diberikan oleh Ketua Cawangan Pendidikan Masyarakat SPRM Kuala Lumpur iaitu Zairinhani Zulkuifly berkaitan insentif potongan cukai dan sesi dialog itu turut menekankan beberapa isu mengenai integriti dan pelanggaran rasuah serta kaedah pembudayaan di dalam organisasi korporat. Kes sebenar mengikut seksyen kesalahan Akta SPRM 2009 turut dikongsikan sebagai contoh tambahan. Selain itu kesemua Ahli Lembaga Pengarah serta Pengurusan Tertinggi FELCRA Berhad turut diperingatkan oleh Pengarah SPRM Kuala Lumpur iaitu Datuk Mohammad Fauzi Husin agar tidak terlibat dengan najis rasuah dan memastikan tadbir urus selari dengan kehendak pekeliling, peraturan dan undang-undang.

### iii) **Program Pendidikan Antirasuah**

Suruhanjaya Pencegahan Rasuah Malaysia mengambil langkah inisiatif dengan melakukan program pendidikan antirasuah yang selari dengan peruntukan undang-undang Seksyen 7(f) Akta SPRM 2009 - mendidik orang ramai menentang rasuah dan Seksyen 7(g) Akta SPRM 2009 - mendapatkan dan memelihara sokongan orang ramai dalam memerangi rasuah. Salah satu usaha dalam pendidikan antirasuah adalah melaksanakan program berasaskan minat atau

interest-based program. Fokus utama program ini adalah untuk menyampaikan dan memberi kesedaran secara berterusan mengenai gejala rasuah dan seterusnya mendidik generasi muda untuk meningkatkan keyakinan terhadap usaha bebas rasuah dalam kalangan masyarakat. Program dan aktiviti pendidikan dilaksanakan di seluruh negara melalui Bahagian Pendidikan Masyarakat SPRM (peringkat Ibu Pejabat) dan Unit Pendidikan Masyarakat SPRM Negeri (peringkat negeri-negeri). Keberkesanan ini diukur setiap tahun melalui Kajian Persepsi Keberkesanan Tindakan Pencegahan Rasuah oleh SPRM dan hasil dapatan kajian akan digunakan untuk memperkukuhkan strategi, merancang pendekatan dan memperbaiki inisiatif Pendidikan dari semasa ke semasa.

Program ini menggunakan dua pendekatan utama untuk mendidik masyarakat iaitu program bersemuka dan hebahan mesej melalui saluran media sosial. Pendekatan program bersemuka ini sebagai contoh forum, diskusi meja bulat, bengkel atau seminar, ceramah, konvensyen, pameran, program turun padang dan sebagainya yang melibatkan aktiviti secara fizikal. Seterusnya hebahan mesej melalui saluran media dilaksanakan di Facebook SPRM, Twitter SPRM, Instagram SPRM, Tiktok SPRM dan sebagainya yang tidak melibatkan aktiviti fizikal namun dapat disampaikan melalui atas talian. Program ini bertujuan untuk meningkatkan tahap kesedaran masyarakat mengenai bahaya jenayah rasuah seterusnya menyemai nilai integriti dan jati diri individu dalam menangkis anasir-anasir buruk dalam setiap lapisan masyarakat. Selain itu, kesempatan yang ada juga dapat digunakan untuk memperjelaskan isu-isu semasa berkaitan rasuah bagi mendapatkan sokongan masyarakat untuk membentasi gejala rasuah.

## **KESAN TERHADAP MASYARAKAT DALAM PROGRAM PERKASA ANTIRASUAH DI MALAYSIA**

Pelaksanaan inisiatif dan langkah-langkah dalam membasmi jenayah rasuah ini mempunyai sasaran kepada semua lapisan masyarakat. Tujuannya untuk melahirkan masyarakat yang bebas rasuah dan memupuk nilai integriti dan jati diri yang teguh dalam menghadapi ujian-ujian kehidupan yang mencabar. Pelbagai muslihat dan pujukan akan ditawarkan oleh golongan pengamal rasuah ini untuk mencapai matlamat mereka walaupun dari jalan yang bertentangan dengan undang-undang. Kekuatan fizikal dan mental juga perlu dititikberatkan untuk menghadapi tekanan kehidupan daripada pelbagai sektor termasuklah kos sara hidup yang tinggi, tekanan kerja, pendapatan yang tidak setanding dengan skop kerja dan sebagainya. Oleh itu, program-program yang dilaksanakan oleh pihak kerajaan adalah perlu untuk

membuka mata masyarakat terhadap bahaya rasuah dan melahirkan generasi yang mempunyai nilai (value) integriti yang kukuh.

**i) Melahirkan Generasi Bebas Rasuah**

Usaha kerajaan dalam membanteras jenayah rasuah melalui program pendidikan yang dijalankan dari peringkat awal sekolah rendah yang terdiri daripada murid tahun 1 dan tahun 6 ini dilihat mampu meningkatkan kesedaran dan pencegahan awal terhadap bahaya rasuah di kalangan masyarakat. Hal ini kerana, nilai jati diri dan integriti dapat dipupuk dari bangku sekolah dan pengamalan sikap antirasuah ini dapat mencegah gejala rasuah sejak peringkat awal. Pendedahan awal ini sekaligus membantu kerajaan mencapai tujuan utama iaitu generasi bebas rasuah. Perjalanan untuk menuju ke arah generasi bebas rasuah ini semestinya memakan masa untuk melihat hasilnya namun setiap usaha pasti akan mencapai kejayaan tidak kira lambat atau cepat. Justeru itu, pelaksanaan program-program yang berteraskan peruntukan undang-undang iaitu Seksyen 7(f) Akta SPRM 2009 - mendidik orang ramai menentang rasuah amatlah penting untuk mewujudkan kesejahteraan masyarakat dan keharmonian sejagat.

**ii) Memupuk Nilai Integriti Dan Jati Diri Yang Teguh**

Natijah yang diharapkan dapat memberi impak kepada masyarakat melalui program yang dilancarkan oleh SPRM adalah memupuk nilai integriti dan jati diri yang teguh. Hal ini kerana kesedaran mengenai isu-isu yang melanda negara Malaysia akibat kegiatan rasuah yang sukar dibendung ini akan merosakkan ekosistem negara sekaligus menghilangkan kepercayaan masyarakat terhadap pemimpin dan pelaburan luar negara untuk melabur di negara yang mempunyai statistik jenayah rasuah yang tinggi. Kesedaran dan penghayatan masyarakat terhadap isu yang melanda ini mampu menimbulkan rasa sayang terhadap negara sekaligus memupuk nilai integriti dalam diri sendiri agar tidak mudah termakan dengan pujuk rayu golongan yang tidak bertanggungjawab kerana mempunyai jati diri yang teguh dan sukar untuk digoda dengan ganjaran-ganjaran yang ditawarkan. Pengamalan nilai integriti ini berkait rapat dengan pekerjaan termasuklah etika dalam organisasi. Oleh yang demikian, nilai integriti ini mampu menyekat penularan wabak rasuah yang berlaku di serata tempat tidak kira di sektor swasta mahupun kerajaan.

### **iii) Memberi Kesedaran Bahana Rasuah Dalam Masyarakat**

Rasuah merupakan jenayah yang dikenali sebagai jenayah kolar putih, atau bermaksud jenayah yang dilakukan oleh seseorang terhormat dan mempunyai kedudukan yang berprestij. Rasuah dianggap sebagai satu jalan pintas untuk mengecapi kemewahan hidup atau dalam erti kata lain untuk menjadi kaya dalam waktu yang singkat. Selain itu, berlakunya rasuah akibat tekanan dari tempat kerja yang meletakkan target yang tinggi namun tidak memperolehi gaji yang setimpal dengan kerja yang dilakukan. Di samping itu, kos sara hidup yang semakin meningkat disebabkan kegawatan ekonomi yang menyebabkan segelintir masyarakat memilih jalan pintas dengan menerima ganjaran yang ditawarkan sebagai rasuah. Oleh itu, inisiatif kerajaan melakukan program adalah salah satu usaha memberi kesedaran tentang bagaimana jenayah rasuah ini boleh terjadi dan kesan yang bakal dihadapi. Dalam masa yang sama, masyarakat perlu berganding bahu membantu negara dengan memupuk semangat antirasuah dalam diri dan menyebarkan sikap benci terhadap rasuah.

### **KESIMPULAN**

Kesimpulannya, keburukan jenayah rasuah ini menjadi nyata apabila ia diserap menjadi budaya dalam sesebuah organisasi dan dinormalisasikan dalam kehidupan. Hal ini kerana jika jenayah rasuah ini berleluasa dan masyarakat membudayakannya maka ia akan memberi kesan serta menjejaskan keseluruhan entiti atau organisasi berkenaan. Perkara ini juga memberi kesan terhadap perkhidmatan, pekerja, interaksi sosial, pelanggan, sistem, prosedur dan sebagainya. Kesedaran dan sikap jati diri yang kuat perlu ada dalam diri setiap individu. Kelemahan dalam menangkis anasir-anasir buruk akan menjerumuskan seseorang itu ke arah jalan yang menyalahi undang-undang. Dalam hal ini, kerajaan juga mengambil bahagian untuk melakukan pemulihan semula generasi bebas rasuah dan mengambil langkah yang proaktif dengan menganjurkan aktiviti-aktiviti yang menarik dan program-program kesedaran mengenai budaya antirasuah dan bahana terhadap negara jika ia tidak dibanteras dari awal. Oleh itu, setiap lapisan masyarakat perlulah menggembelng tenaga bagi membanteras isu rasuah yang semakin berleluasa di Malaysia dengan menguatkan semangat antirasuah dan memupuk nilai integriti dan amanah dalam diri.

### **PENGHARGAAN**

Kami ingin mengucapkan jutaan terima kasih kepada pihak Kementerian Pengajian Tinggi Malaysia (KPTM) kerana membiayai sepenuhnya kajian ini di bawah Projek Penyelidikan *Fundamental Research Grant Scheme* (FRGS) USIM, dengan tajuk

Pendekatan Bersepadu Pencegahan Rasuah Berdasarkan Kerangka Syariah Dan Perundangan Di Malaysia Ke Arah Wawasan Kemakmuran Bersama 2030, Kod Penyelidikan USIM/FRGS/FSU/KPT/50922. Ketua penyelidik juga ingin merakamkan penghargaan kepada ahli kumpulan penyelidik kajian ini atas kerjasama yang diberikan.

## RUJUKAN

- Ab Rahman, A., Aziz, M. Y. A., Salleh, A. Z., & Kamarulzaman, A. N. (2023). Gejala Rasuah Dan Implikasi Terhadap Masyarakat Malaysia Menurut Perspektif Syarak: The Symptoms Of Corruption And Implications For The Malaysian Community According To The Shariah Perspective. *Journal of Fatwa Management and Research*, 28(2), 87-103.
- Adli Mohammad. 2023. 'War' Inisiatif SPRM Didik Generasi Bebas Rasuah. <https://www.trdi.my/war-inisiatif-sprm-didik-generasi-bebas-rasuah>.
- Andreas, P. (2017). Fixing Performance Management. How To Develop And Use KPIs And Appraisal To Manage Your Team. Expert Views Publishing.
- Dato' Ahmad Khusairi Haji Yahaya. BAHANA RASUAH MENJADI BUDAYA. [https://www.sprm.gov.my/admin/uploads\\_publication/rencana-bahana-bila-rasuah-menjadi-budaya-jurnal-my-15112020.pdf](https://www.sprm.gov.my/admin/uploads_publication/rencana-bahana-bila-rasuah-menjadi-budaya-jurnal-my-15112020.pdf).
- Daud, E. (2019). Faktor-faktor dalaman yang mempengaruhi niat individu untuk mengamalkan rasuah di kalangan penjawat awam pihak berkuasa tempatan. *Jurnal Kemanusiaan*.
- Hanum, N. S. (2013). Keefetifan e-learning sebagai media pembelajaran (studi evaluasi model pembelajaran e-learning SMK Telkom Sandhy Putra Purwokerto). *Jurnal Pendidikan Vokasi*, 3(1), 90-102. <https://doi.org/10.21831/jpv.v3i1.1584>.
- Manaf, M. T. A. (2021). Pencegahan Rasuah Ke Arah Menginsankan Pendidikan Di Malaysia.

- Mandu, R. B. (2020). Peranan Pihak Pengurusan Organisasi Kerja Dalam Membentuk Satu Sistem Penilaian Prestasi Yang Menggabungkan Sistem Penilaian Pekerja Dan Prestasi Korporat.
- Maszureen Hadzman. 2023. Program Pemantapan Antirasuah, Integriti antara Felcra dengan SPRM. <https://www.utusan.com.my/nasional/2023/09/program-pemantapan-antirasuah-integriti-antara-felcra-sprm/>.
- Noor Mohamad bin Shakil Hameed. 2023. Selamatkan Belia Dari Gejala Rasuah. [https://www.sprm.gov.my/index.php?id=21&page\\_id=103&contentid=2946&cat=BKH](https://www.sprm.gov.my/index.php?id=21&page_id=103&contentid=2946&cat=BKH).
- Noor, M. M. (2020). Bangsa Malaysia Narrative: Knowledge, Indigeneity and Nation-state in a Diverse Society. *International Online Journal of Language, Communication, and Humanities*, 3(2), 33-49.
- Portal Rasmi Suruhanjaya Pencegahan Rasuah Malaysia.
- Rahim, A. A. (2022). Hari Integriti dan Anti-Rasuah UniKL 2022.
- Setyosari, P. (2013). *Metode Penelitian Pendidikan dan Pengembangan*. Kencana.